

Dewan Rakyat: Rang Undang-undang Perbadanan Pembangunan Kampong Baru 2011 Dibentangkan Hari Ini
Bernama
3 Oktober , 2011

KUALA LUMPUR, 3 Okt (Bernama) -- Kerajaan Isnin menarik balik Rang Undang-Undang Perbadanan Pembangunan Kampong Baru 2010 dan menggantikannya dengan Rang Undang-Undang Perbadanan Pembangunan Kampong Baru 2011 dengan beberapa pindaan, termasuk mewujudkan lebih banyak wakil daripada kalangan penduduk kawasan itu.

Antara pindaan yang dibuat ialah mewujudkan jawatan Timbalan Pengerusi Perbadanan Kampong Baru daripada kalangan pemilik dan pewaris tanah serta menambah keanggotaan Majlis Penasihat kepada perbadanan daripada kalangan pemilik dan pewaris tanah Kg Baru daripada dua orang kepada enam orang.

Menteri Wilayah Persekutuan dan Kesejahteraan Bandar (KWPKB) Datuk Raja Nong Chik Raja Zainal Abidin berkata jawatan Timbalan Pengerusi perbadanan itu akan bertindak membantu dan menyokong tugas pengerusi, selain menjadi wakil kepada penduduk Kg Baru.

Di bawah Rang Undang-Undang Perbadanan Pembangunan Kampong Baru 2010 diperuntukkan dua wakil daripada kalangan penduduk Kg Baru, tetapi di bawah rang undang-undang baru ini wakil pewaris dan tuan tanah di kawasan itu ditambah empat lagi termasuk jawatan Timbalan Pengerusi," katanya pada sidang media di lobi Parlimen di sini hari ini.

Mengenai 15 anggota Majlis Penasihat, termasuk jawatan pengerusi perbadanan itu, katanya perbadanan itu akan mempunyai enam orang anggota wakil penduduk Kg Baru termasuk jawatan Timbalan Pengerusi.

Raja Nong Chik berkata di bawah rang undang-undang baru ini juga pandangan Majlis Penasihat perlu diambil kira oleh perbadanan itu berbanding rang undang-undang sebelum ini di mana pandangan Majlis Penasihat tidak memberi kesan kepada keputusan perbadanan.

Beliau berkata perubahan-perubahan itu dibuat setelah mengambil kira pandangan pemilik dan pewaris tanah serta badan-badan bukan kerajaan (NGO) berkaitan dalam beberapa siri perbincangan yang diadakan sejak awal tahun lepas sehingga semalam.

"Perubahan-perubahan ini bukan bersikap kosmetik sahaja tetapi diambil kira pandangan-pandangan NGO seperti wakil daripada MAS (Lembaga Pengurusan Petempatan Pertanian Melayu), Persatuan Perbadanan Kampong Baru dan lain-lain.

Ditanya sama ada ia dipinda atas desakan pembangkang, Raja Nong Chik berkata Rang Undang-undang Perbadanan Pembangunan Kampong Baru 2011 adalah tanggung jawab kerajaan.

"Semua cadangan datang daripada mereka (pemilik dan pewaris tanah) bukan Pakatan Rakyat, (Anggota Parlimen Titiwangsa, Allahyarham Dr Lo'Lo Ghazali) bukan datang dari sana. Mereka adalah pemilik tanah, tidak ada kaitan dengan pakatan, malahan tanpa pakatan kita akan lakukan yang sama," katanya.

Rang Undang-Undang Perbadanan Pembangunan Kampong Baru 2010 dibacakan pada kali pertama pada persidangan Dewan Rakyat pada 14 Dis tahun lepas dan ditangguhkan pembentangan untuk bacaan kali kedua pada sesi Dewan Rakyat Jun lepas.

Raja Nong Chik berkata selain itu, kuasa perbadanan dalam menguruskan hal pengambilan tanah di Kg Baru turut dikeluarkan daripada Rang Undang-undang Perbadanan Pembangunan Kampong Bharu 2011.

"Isu tanah sangat sensitif, saya fikir rundingan dan perbincangan sangat penting, mereka ada pelbagai rancangan. Untuk mendapatkan manfaat yang maksimum ia mestilah dibangunkan secara komprehensif.

"Inilah di mana perbadanan akan memainkan peranan untuk memudahkan syarikat berkaitan kerajaan yang dipilih untuk membangunkan tanah itu," katanya ketika ditanya cara yang akan digunakan kementerian itu dalam membangunkan tanah di Kg Baru.

Antara perkara lain, Raja Nong Chik berkata MAS, yang diwujudkan di bawah Rang Undang-undang MAS 1950, akan dikekalkan di bawah Rang Undang-undang Perbadanan Pembangunan Kampong Baru 2011.

"Ini adalah atas keyakinan KWPKB serta hasil perbincangan dan kerjasama yang dicapai dengan warga Kg Baru," katanya.

---BERNAMA

Hakcipta © 2011 BERNAMA

Source: <http://www.bernama.com/bernama/v5/bm/newsindex.php?id=617345>